

Inatsisartut suleriaasianni § 37 naapertorlugu matumuuna Naalakkersuisunut apeqqutit imaattut saqqummiuppakka:

Apeqqutit:

- 1. Pisortat suliffeqarfiutaani avataasiorluni aalisarnermik ingerlataqartumi pinngitsoorani kalaallinik aqumiunik sulisoqartalernissaanik Naalakkersuisut qaqugu piumasaaqaateqalerniarpat?**
- 2. Imartatsinni pisuussutit uummassusillit nammineq pigisatsit taakkartortarpavut, taamaakkaluartoq suli ulloq manna tikillugu isiginnaartuinnartut aalisartortavut inissisimatippavut, paaserusunnarsivorlu qaqugu aalisartooq nunamini salliutinneqarluni pisassinneqartalissava?**

(Inatsisartuni ilaasortaq Nikolaj Jeremiassen, Siumut)

Tungavilersuut:

Siullermut: Inuiaqatigiit akilikkatsinnik imarsiornermut ilinniarfiit ingerlatippavut, qujanartumillu taakku aqutugalugit imarsiornermik ilinniarsimasut Kalaallit amerlipput, taamaakkaluartoq piumasaaqatinik naammassinnittunik allagartaqaraluartut killilerujussuarmik atorniarsarivagut. Nunat sanilerisavut qissimigaartakkavullu tassaqa taamatut suleriuseqarpat? Tassami nunatsinni imminut pilersorneq siunertaavoq, akileraarutillu nunatta aningaasaqarneranut iluaqutaaniartussaagaluarput.

Imartarput kikkunnununa inuiannut inuussutissarsiorfinngortinniaripput? Avataasiutinik aalisariuteqassuseq qissimigaaraanni, aalisariutit 20-vit sinneqanngillat, taakkualu saniatigut assartuussinermi inunnillu angallassisutit aamma kisissaapput, tamannaana toqqaammavigalugu paaserusunnartooq, qaqugu nunatsinni innuttaasut aqumiutut ilinniarsimasortavut suliassanut malunnaatilimmik akisusaaffinnik tunisalerneqarnerisut, tassami aquttarfimmiutut ilinniarsimassutsikkut naammattumik allagartallit nunamini salliutinneqanngimmata.

Aappaanut: Nunatsinni inuussutissarsiutit pingaarnersaat aalisarnerq aalisartunit ingerlanneqassasoq oqartaraluarluta, pisassiinermi tunulliussimaartuarpavut eqqumiiginanngitsuungitsumik, asungooq ilaatigut aalisarnermut nunatta avataaniit ilinniartinneqassammata allanik pisassiisarpugut, ila sumununa ingerlasugut? aalisarnerq ataasiuvoq, aalisariaatsilli assigiinngilaaginnarput, aalisartullu nalunngilluinnarpaa aalisakkani suuppat qanoq pisarissanerlugu, nunatsinni aalisartut nikassarnagit akisusaaffinnik tamakkiisumik tunineqarniarlik.

Apeqquteqaatimma ullut suliffiusut qulit iluanni akineqareersimanissaat kissaatigaara.